


廣西通志二十八

陽明文庫圖書
五十五冊
共二冊
學習院圖書館

近世
5-86
カ2





廣西通志卷之二十八

人物志二

近衛本

甘思名蒼梧人成化十六年舉人知大庾縣

愛民人樂其平易致仕歸蕭如尚書吳獻臣

表其墓

單彬馬平人弘治初爲南平主簿性剛明勇於爲

義雖勢豪不避延平守沈榮素有清聲雅善彬

嘗作對旌之曰清慎持身與百姓秋毫無犯公

勤敏政以一人數事常善蓋實錄云

翟觀臨桂人弘治二年以舉人知瀧水縣縣苦盜
觀開誠撫綏盜用解散民賴以安三年父喪歸
士民愬于朝遷肇慶通判盜尋斂迹久之以同
知領縣建東西兩營分縣兵居守建五十九砦
籍其人爲砦兵盜不敢復窺瀧闢荒田九百頃
鑿水圳四十八處縣人頌之

石邦柱字安國蒼梧人弘治壬戌進士知南海遭
喪歸士民走督府白其治行乞留服闋知蕭縣
盜王浩者健猾莫可得邦柱設法擒之遷知柳

州時徭與流賊間比爲亂邦柱撫諭徭使各安
業賊勢孤發兵往捕多所斬獲移丞長沙清王
府占田擒巨盜徐紹等陞南京戶部郎丁憂復補
工部郎忤執政意出守瑞州尋以疾罷歸建龍
泉書院教族人與鄉子弟置田院中年八十卒
鄉人營景賢祠祀之

曹穆字德容全州人成化庚子鄉薦授南豐訓導
擢荆門州同知得漏伍幾四百戶遷夔陵守城
圯立完之巴東流賊起率民戰守賊不敢犯引

疾歸會歲饑謀于蔣公冕就湘山大雲二寺作
粥飼饑存活無筭子鶚官知州今科甲蟬聯
張翺字鵬舉宣化人登成化鄉舉任龍門知縣崇
學校增田畝士民孚洽會逆瑾羅織天下郡縣
官遣使至縣買藥索金憚翺廉平無所取翺忤
其意解組歸有富民議貸出金者翺堅拒不聽
明農後杜門却軌課兒孫教鄉子弟多所成就
鄉人月旦推重焉

周琦字廷璽馬平人成化辛丑進士遂于問學嘗

謂堯舜禹湯文武周公孔子孟軻道之準的也
周程張朱道之羽鏃也不審視其羽鏃安求準
的因著東溪日談十八卷又著儒正篇論薛河
東之學爲心印濂洛神合洙泗蓋學于河南閭
錫其所傳有自來矣成化間獍賊猖獗琦時爲
南京戶部員外上疏指陳多中時獎時論題之
同郡有簡弼者登弘治鄉舉通判肇慶起居語
默俱中程度亦以道學稱

蔡夔字彥章成化十六年舉人授寧都令決繁訟

釋寃民凡祀典不載淫祠必毀之門絕私謁綽
有清聲以艱歸吳廷舉餞之詩曰有區旌人政
無貲復故鄉服闋補知安遠清介如前居鄉授
徒凡造就者登科甚衆燕居獨處不脫衣冠梓
里中多做法之

李嘉言桂平人成化間舉人歷官蘇州同知郡糧
長多逋負賂官以免爲故常有賂嘉言以千餘
金者卽發之重其罪以前金究所逋負糧長惴
服爭輸恐後積弊遂清擢江西僉事見寧濠有

逆萌曰不去禍將及我遂移疾歸

李璧字白夫武緣人登弘治己卯鄉試初領教蘭
谿復教仁和陞知劍州丞臨安陞戶部員外郎
璧斤斤慕古嘗蒐輯三禮詣大常求觀樂器躬
自裁定咸有成書學官科貢題名石釋奠議鍾
鼓銘無不釐正所至嘉與賢士大夫游如都少
卿穆張布政言邵尚書寶康諭德海呂太卿枏
章尚書懋湛尚書若水許給事相卿陳府尹良
器各有稱述

劉旭字士真臨桂人任江西南昌府學訓導履嚴行飭學士張元禎檢討莊杲俱重其爲人元禎爲其母作墓志謂士真去吾失賢友矣別號平齋杲嘗賦平齋詩贈之

朱塗字孔貴陽朔人弘治間進士授比部主事轉曹郎卓異有聲拜雲南巡按御史塗負當世才雪冤剔弊臨事敢爲逆瑾竊柄塗持正不阿尋陞密雲副使卒于任官屬入視橐無遺貲至今稱廉能必曰朱御史從祀鄉賢

陳邦傳全州人弘治戊午舉人仕至順天府治中丈艸場奪還勲戚貂璫侵地遷雷州府同知弟邦俸正德舉人仕鎮寧知州亦多善政

莫鈍字茂實荔浦人少穎敏登弘治辛酉鄉薦初授浦江訓遷知均州在任八年清慎如一日後丁父憂服闋補眉州尋卒于官一貧如洗其後子砥登正德丙子鄉科人謂積善之報云

黃聚字朝會藤縣人舉弘治進士大理寺評事歷寺正性廉慎讞獄明允親疾嘗便溺居喪廬墓

祀鄉賢

陳祿懷集人少穎異結茅夜讀聞水神呼陳進士
弘治庚戌果登第分符劇縣擢比部主政轉郎
中出守撫州值宸濠之變設策相機與王文成
共圖剿逆後謝政家居疎財仗義造書舍訓士
鄉人德之

梁高字俯之武宣人早孤性敏異領弘治乙卯鄉
薦知廣東臨高縣爲政清廉當道薦其才冠十
邑尋辭歸耳貧隱居鄉人重之祀鄉賢

莫懼字義之橫州人弘治乙卯鄉薦授饒州府判
居官清謹時萬年縣新立推懼往署懼綜理周
密恩威并用吏畏民服尋以丁艱歸復授福州
府判革攬戶却常例讞獄明允引疾歸居鄉落
落不苟合少孤家業統于伯兄終其身不忍分
邦人重之舉祀鄉賢

常鑾字君用橫州人弘治乙卯鄉薦歷大庾秀水
訓導陞寧鄉令愛民育士恤獄緩刑民間誼頌
之致政歸民不忍舍歸祀鄉賢

常廣空山人宣德二年進士爲御史以廉稱罷官
鄉居有故人按部至郡廣方漁于江故人猝至
前導問廣曰常御史家安在廣指曰前村是也
騶從既過乃登岸疾走從後入衣冠出肅客故
人曰公何熱汗流如此廣曰適在近村聞公至
亟歸走乏耳左右竊曰好似江中打魚人廣聞
之言笑如故

蘇忞懷集人宣德七年鄉試第一任靖州守興水
利修學校視民如子正統間苗賊流劫至七里

坡將襲州城忞率民兵五百人與戰衆寡不敵
歿之妻蔣氏以守節稱

戴欽字時亮馬平人登正德進士爲刑部主事歷
郎中時見素林公爲大司寇每有大典禮大獄
訟必屬劄藁公援筆立就無不允當林公甚重
之公長於詩喜交宇內賢豪時信陽何大復關
中馬西原大梁李川甫亳州薛君采皆與公遊
時相賡詠後坐議大禮廷杖歿公爲文及詩清
新俊逸所著有鹿原集玉溪存稿

唐濠字文煥全州人先人遺田四十畝供讀書子
姓公曰讀書分內事何以田爲盡以贖宗族登
成化甲午鄉榜授廣東番禺令時山賊發連年
公至遣諭之盜悔禍境內遂安隣邑黃馬二家
構訟十二年不決公白之考最入京道卒

胡倬字用晦臨桂人成化二十年進士莅事警敏
任戶部員外郎累抗中官下錦衣獄事白尋復
官同時稱其勁直後擢陝西僉事轉固原副使
傳獻策馬平人弘治中舉人爲肇慶通判廉潔自

守遷本府同知居郡最久其清操如始至後勸
權貴子弟不屈法竟坐罷官輿論惜之

楊霖藤縣人弘治二年舉人官德慶知州遇事勇
敢不避權勢嘗劾管糧主事時論偉之

呂景蒙字希正象州人弘治間舉人歷監察御史
以直言謫潁州判官轉汲縣知縣後陞福州府
通判大理寺評事俱未就嘗推重柳之先輩周
東溪琦簡駕鶴弼爲儒者之學其所談理道粹
狀一出於正總督兩廣張公岳重之有事于柳

過象州造其廬接談竟日表其宅曰理學名儒
所著有定性發蒙象郡學的二書及柳州府志
十六卷

計宗道字惟仲馬平人其先有名仲政者洪武間
縣令張霖薦其材略足制諸蠻以諸生官巡檢
谿洞反者多所擒滅諸蠻皆畏之至宗道遂以
文學起未冠鄉試第一舉弘治進士知常熟宗
道性敏達卽上意見偶異必爭執得當乃已嘗
議常熟應蠲減者卽守以爲不可宗道曰今誠

非才安敢違農時而忽萬人之命竟緩徵民賴
以甦後轉延平同知入爲戶部郎出守衡州卒
初常熟桑悅自長沙改判柳州公隨諸生間往
質疑桑罷歸貧亾子公至縣迎養于廨及沒親
視歛塋之穿山其篤于情誼若此

甘泉貴縣人成化庚子鄉試授常州府推官以憂
去復補蘇州清刑慎獄人罔稱寃征崇明海寇
有功當道交薦會勘徐府庄田適逆瑾用事竟
免官養高林壑士大夫雅推重之所著有東津

手稿

蔣璣字天器平樂人弘治壬子舉人授連城知縣璣始城連城而武平賊劉隆作亂隣邑多被剽劫惟連城賴城故全由是以智勇聞當道檄擄他賊被執不屈遂遇害事聞贈汀州府同知廕其子國子生

莫相興業人字廷佐弘治戊午舉人除授雲南亦佐知縣累遷廣東僉事所至有聲時海寇許折桂聲勢張甚相躬請撫諭賊乃歸欵後退居林

下者數年接人無貴賤賢愚各得其懽起爲四川僉事以年老告歸

鍾英字世傑陽朔人首舉于鄉弘治間任儋州知州公廉簡肅典利除害崇學校增田畝民蒙其利蒞政八年不以妻子自隨卒于官囊橐蕭然李信平樂人舉人官德安府同知清介通敏一時郡寮莫能及考績荷璽書褒寵居鄉有行誼

張拱辰富川人弘治辛酉舉人天性純孝丁父艱哀毀骨立服闋授交河教諭迎母就養會母疾

作辰日夜哀禱已而母愈遂具疏乞養得改廣
東龍川縣學尋陞汀州府教授造士有成聞母
訃哀痛成疾卒于汀邑人悼之

石瓏字美中蒼梧人領弘治鄉書性至孝以母老
不欲遠違授靈山諭九載左遷南通州司訓尋
陞國子學正出知宿松縣力于惠民有水蘖聲
弟石璜領鄉書仕有惠政

蔣曙字景明全州人弘治癸丑進士知贛縣剗理
盤錯務與民休息轉南京戶部主事改浙江道

監察御史未幾出知保定府郡故多中人第宅
事屬姻連輒爲牽制公下車廉得其狀黥其強
梗數人榜揭通衢自後諸豪稍稍引去時流寇
薄城圍六日公督兵城守示無戰意潛兵要其
歸路賊驚遁陞山東按察司副使脩兵天津上
典革利弊八事上納之秩滿調廣東按察副使
陞布政司左叅政會樊家屯賊猖爲亂公募鄉
道引至賊營宣示禍福潛兵從間道搗諸賊巢
內外夾攻斬獲首從賊千餘級前後紀功超擢

江西右布政使轉湖廣左轄晉都察院右副撫
治鄖陽時賊首倪道真廉欽等聚無賴子弟鑄
刻符印僞署職官攻掠郡邑公分遣游兵潛伏
要路盡獲首領而還由鄖陽晉工部右侍郎特
疏乞休公自第後先世所遺悉義讓諸昆所餘
祿入增置祭田采輯諸禮爲家乘所著有竹塘
集

徐乾字健夫臨桂人正德間進士知新會撫定僞
州諸黎因與約世世納稅歷廣東叅政爲福建

按察使以忤直指意不列薦書朝議紛狀擢乾
福建右轄隨擢湖廣左轄用快公議云乾性行
直亮多與世迂坐靖藩親格於令甲不得內遷
屢移疾乞歸湖廣顧巡撫璘獨薦其才器可大
用屬駕南狩乾竟以迂從駕貴人逮至京獄具
罷官歸

莫駿平樂人登正德鄉舉授江西南豐縣知縣擢
南京戶部員外郎駿爲諸生時徭賊掠其村母
齊氏遇害駿誓必報詣軍門請自率兵深入俘

其賊首以獻仍上兵食戍守之宜爲久遠計昭人至今誦其功撫兄遺孤如已子歷仕二十餘年廉介如一日所至有去後思乞休歸囊無長物泊如也

毛錦臨桂人六歲喪父以不知祖母墓爲恨每歲時上先墓輒大哭忽一日行山間見艸中有荒墓撥艸視之碑尙存卽祖母墓也孟御史洋時謫桂教授聞其事以詩贈錦

蕭淮字東之臨桂人正德進士由行人授御史時

逆濠將作難自胡世寧范輅以疏濠狀相繼得罪無敢言者淮具奏曰臣近聞陛下遣司禮監傳諭諸王府使至京者毋得久留邸舍聖意蓋深遠矣何者寧藩惡貫已盈厚毒方潰賊臣逆子鱗集左右往往遣使熒惑輦轂下來則接踵去則經年不知爲謀竟何紀極臣竊謂凡稱從寧藩來者毋問久近繫治之早翦其萌爲力尙易也臣又聞前江西左布政使鄭岳副使胡世寧賊黨磨謀陷害幾死夫旣爲彼所摧折必爲

彼所畏忌如此兩人請亟復官彼一聞之氣當
自奪兩人感奮並力以前賊滅不久矣奏上不
數日反書聞世宗嗣位疏論寧彬及中侍谷大
用世宗雅納之時錦衣冗員無下數千准承旨
清刷梳剔陞光祿少卿會大同卒叛殺總兵逐
代王廷議簡准往至則謁代王已而故會鎮巡
曰高晏卒果來窺乃麾之入入可二百人厲聲
堵立准不爲動慷慨數語二百人者受指麾聽
操閱如故拜准僉都御史巡撫延綏嚴攻守

斥堠方大用之而訃至矣所著有麗州集

高嵩字世瞻空山人弘治間以舉人教諭保昌龍
泉下遷訓導霍丘陞伴讀興府又久之爲審理
正正德末年世宗卽位錄興來功拜嵩大僕少
卿復迎太后興邸旣遣行視京營諸處操騎及
順保河三郡馬政會大禮議成有上言乞遷顯
陵者嵩極論其不可以爲松林一山龍虎盤踞
皇上入承大統雖由天啓未必不原于此今欲
起萬載不搖之壙跋涉數千里之險非惟陛下

暨臣等之心不安雖行道之人亦有所不忍者
上意乃止不數年以卿領大僕上言馬政便宜
數事以疾卒官蒙賜祭塋廕其孫重

蔣淦字汝潔全州人登進士爲兵部武選主事從
郎中出知嚴州迎母就養會飢母捐金市餅食
民人感之如投醪狀憂去郡人爲刻石紀政服
闋補惠州淦性近民聽訟不煩鞭朴屬歲籍報
戶口盡力清察主榷里魁姦不得售尋擢河南
叅政歷順天尹上時政四事痛言積弊未幾陞

工部右侍郎尋致政淡薄寡營鄉人稱篤行君
子云

唐元殊字同卿臨桂人父淳貳汀州時元殊甫九
歲過大守署觀牡丹索筆賦之守以爲夙構命
別賦立就數十言體裁特出守大異之正德丙
子年十四鄉舉第一元殊任達不羈性喜飲飲
數斗卽跳舞作狂態運筆藻思湧湧若有神好
事者卽所作必俟酣乃漬墨投楮云里中任唐
舊有詩名及見元殊作輒驚歎狀元殊亦服唐

互相推重

馬文祥字時明桂平人與弟文奇博洽善文詞文奇魁于鄉文祥由歲薦授文昌知縣會採珠議省珠池無益費時多海寇計畱綏靖未幾遭內艱復補宜城縣上知其才擢南京戶部主事出理鳳陽諸倉奏最荷封典以疾告歸所著有西園傳羨集

龍睿容縣人正德五年以吏員丞博羅時洪溪諸洞賊稱亂璿主捕詰單騎詣賊砦視狀賊驚曰

是將不利于我廼堅壁鼓譟以恐之璿諭以禍福賊開門迎降自後無敢肆掠者又嘗主催科一無所私卒于官至亾以爲歸計

喻江字潮之藤縣人弘治五年舉人知餘杭調奉化舊鎮守市舶以和買土物爲名誅求甚急一切報罷丙戌大歎江約已裕民凡相告訐誨諭而遣之爲令九載以力不能赴京棄其牒而歸江與弟淮河漢四人淮河皆舉于鄉漢登正德甲戌進士河爲大理通判以治河奏績漢爲御